



左文襄公奏稿卷二十九

起同治七年戊辰九月訖十月

目錄

餉項苦絀懇增撥鉅款以利戎機摺

覆陳防剿事宜摺

行抵孟縣分起渡河并派員跣緝游勇片

請停各省皖捐片

陝省西北兩路剿賊獲勝摺

劉端冕截剿董志原回逆續獲大勝片

劉厚基進剿清澗兩獲大勝并成定康克獲奇捷片

恭報旋陝日期及會籌調度情形摺

奏稿卷二一九日錄

道員支款浮濫請旨革職片

各路擊賊獲勝并分由山西兜剿先固河防摺

老湘全軍額餉領項請敕兩江督臣照舊解支摺

陝甘米捐兩局收捐正印各項官階懇准展限一年片

甘捐請獎請照陝章由設局省分督撫咨送部監片

剿賊連獲勝仗摺

彭玉麟撥助陝餉片

知府成定康請以道員記名簡放片

請將冒餉之丁大洋正法片

軍餉匱絕請敕籌撥實餉急救危疆摺



軍機大臣字寄同治七年九月十八日奉

上諭前據穆圖善奏請敕左宗棠撥還甘餉當交戶部速議具奏茲據該部奏稱查左宗棠前借洋款銀二百萬兩係因酌撥甘省津貼陝軍酌濟晉防等處客兵散放慶涇一帶甘餉并移徙漢民安撫降回飢民起見又係在左宗棠各省協餉內劃抵本非協甘專款本年左宗棠追捻入直既未另立糧臺亦未另籌協濟不得不提用甘餉軍需不能預定數目餘款卽不能預知多寡自不得不先提二十萬兩解甘其去陝較近之甘軍亦不得不於前款內酌提就近撥給該署督所陳各節係於左宗棠奏借洋款及援師赴直各緣由未能深悉若令左宗棠將此項撥還甘省則左宗棠

奏稿卷二十九

入直之餉又歸無著各等語穆圖善所奏雖未洞悉源委而甘省兵餉支絀情形朝廷久深廛念左宗棠見已赴陝卽著將前借洋款及關稅銀二百萬兩除入直提充軍餉外餘存若干迅速秉公覈算以一半解甘一半留陝毋得稍分軒輊本年八月間戶部奏准於各海關六成洋稅項下指撥左宗棠軍餉一百萬兩亦著分半解甘毋稍短欠見據湖廣督臣先後奏報管理鄂臺王文韶已將九江關協餉二十萬兩江蘇等省協甘半餉十萬兩洋稅提撥銀五萬兩分起解赴漢中轉解卽著穆圖善派員迎提以資應用并著左宗棠嚴飭王文韶等將應解甘省半餉隨到隨解不准遲延其河南山西陝西湖北四川江蘇應解專協穆圖善月餉及山

東山西河南應解協甘半餉每月共銀十一萬三千餘兩著戶部  
開單嚴催專解穆圖善軍營藉資接濟左宗棠入直提用洋款數  
目并著查明咨部備覈將此由五百里各諭令知之欽此

奏稿卷二十九

餉項苦絀懇增撥鉅款以利戎機摺

同治七年九月二十四日

奏爲餉項苦絀懇

恩增撥鉅款以利戎機而奠危局仰祈

聖鑒事竊陝甘變亂已久軍威不振其原因由於餉源奇絀無以養軍致士氣日頹無以制賊迨爲時既久賊勢仍張復議廣募客軍以求速戰之效於是兵數日增而餉事日絀非僅不能制賊且更以增賊今之土匪哥老匪游勇潰勇則皆無餉之軍不能制賊反以增賊之明驗也餉足則將能馭軍而軍不敢犯兵能衛民而民不受擾不足則反是聖人論政以足食爲先如不得已則以去兵爲急事理昭然豈必今異於古陝甘餉源之絀人皆知之陝西每

奏稿卷二十九

三

年缺餉一百四十餘萬兩甘肅每年缺餉三百餘萬兩均經署撫

臣劉典署督

臣穆圖善陳奏

臣前疏請撥實餉謂陝西每年缺餉

一百五六十萬兩蓋并

親軍各營合計不僅一百四十餘萬兩

也謂甘肅每年缺餉二百餘萬兩蓋除歸併陝西供支之甘軍而言謂約止二百餘萬兩也合兩省計之缺餉總在四百餘萬兩從

前髮逆捻逆未平天下之患在東南財賦之鄉中原腹心之地勢

固難以全局注之西北一隅疆

臣

坐視淪胥不敢爲過望之請計

但期敷衍無以應如願之求往復空文徒成畫餅茲幸捻氛淨

掃海宇蕩平各省解嚴與民休息計清釐積欠酌畱兵勇爲費雖

尙不資而節出之餉需贏餘之釐金洋稅總不下千餘萬兩用東

南之財賦贍西北之甲兵各省勢本有餘而陝甘則得半斯足此可爲陝甘常年經費請者也

諭旨允軍機大臣戶部之請撥各海關六成洋稅項下銀一百萬

兩爲臣西征實餉由臣酌撥甘肅自本年十二月起按月協解爲

數本不爲少惟臣親軍各營五千餘外新開馬隊九營挑留吉林

馬隊三起此外劉松山新增步隊三營馬隊一營郭運昌新增馬

隊一營又全福增募吉林民勇馬隊三百皆踰於常額計日授食

每月卽需八九萬兩何有贏餘分撥甘肅且此項旣自十二月起

算各海關縱如數如期協解水陸程途逾數千里非俟明年春夏

之交頭批不能抵陝此數月閒懸軍待餉遇有調發何以應之或

奏稿卷二十九

四

者陝餉尙有存餘堪資挹注則挪彼應此事猶可爲而途次接閱

劉典鈔摺咨會知洋款業經用盡林壽圖詳稱司庫一空如洗穆

圖善方索分洋款咄咄逼人卽欲稍事通融憑何著手而尤可惜

者秦中兵事經劉典調度大有轉機諸將士盡力殫誠著有成績

觀回逆之紛議移巢土匪之款營乞撫可見其震懾兵威茲復聞

臣弭節西旋軍容甚盛其恟懼實在意中如果糧餉充餘因其恟

懼攻之事半功倍畱秦諸將領函牘頻來亦均有急擊弗失之請

僉謂臣已挈重兵鉅餉還秦鞫撫兼籌事無不克而不知臣方垂

囊入關兵力雖屬有餘餉事無從取給也無論籌餉則必裹行糧

儲芻粟設轉運籌撫則必籌安插給口食散籽種非有寬餘款項

應手不能隨時舉辦卽令按兵坐食一無所事豈能枵腹忍飢遠待數千里外隔年之協餉以舉火哉合無仰懇

天恩敕下兩江督臣江蘇撫臣湖廣督臣湖北撫臣兩廣督臣廣

東撫臣粵海關監督將各海關六成洋稅各照軍機大臣戶部原

撥之數共計一百萬兩提前協解務於今臘明正到陝以應急需

如各海關一時未能湊集如數卽援照成案仍由各督撫臣出備

印票交臣上海轉運局福建道員胡光墉領收轉向洋商借取見

銀解陝以期捷速仍由各督撫臣按期撥還歸款其息銀先於借

款內劃扣統由臣報銷計此項提前數月到陝臣可將亟應辦理

各事及時籌辦不致坐失事機而於各海關款目仍無出入其此

奏稿卷二十九

五

項未到之前遇有緊急機宜陝西無款可籌并懇

天恩敕下山西撫臣於河東鹽課項下無論京協各款提撥二十

萬兩四川督臣於鹽釐項下提撥二十萬兩迅速解陝庶期就近

有款接濟掣肘無虞臣得一意經營別無顧慮陝西大局之幸亦

臣之幸也至陝甘全局之安危不爭一時兵事之利鈍緣地方凋

敝異常又頭緒紛繁刻難就理一面用兵卽須一面籌辦善後庶

幾一了百了後必無災診疾雖在延醫處方必須購藥藥品足備

攻達乃神治重病則藥不得輕治久病則功難求速應仍懇

天恩敕下軍機大臣會同戶部妥籌陝甘常年實餉自明年伊始

事定而止每歲於各海關洋稅各省釐金項下劃提實銀四百萬

兩分給陝甘酌時勢之緩急定協餉之多寡臣當率在事諸臣盡心力之所能到者黽勉圖維與西事相終始期挈全境還之朝廷斷不敢或作或輟虛負

恩知亦不至以餘粟餘財自汙素節區區愚悃冀荷

鑒原所有兵情賊勢及分支洋款細數應俟抵西安後會同劉典據實馳報合併聲明伏乞

皇太后

皇上聖鑒訓示施行謹 奏

軍機大臣奉

旨軍機大臣會同戶部速議具奏欽此

奏稿卷二十九

六

覆陳防勦事宜摺

同治七年九月二十四日

奏爲遵

旨覆陳事竊

臣

於九月十二日湯陰縣宜溝行次欽奉九月初十

日

寄諭給事中陳廷經奏西陲未靖宜及時抽調會勦屯墾招安敬  
陳管見一摺見在直東等省雖已肅清而粵捻各股降眾在各軍  
中尙不下三兩萬人各省凱撤兵勇爲數亦多陝甘軍務方殷左  
宗棠所帶之兵不過三萬該給事中以東皖等省或酌畱萬餘人  
或數千人坐耗糧餉不如驅使勦賊請畱養精銳以杜亂萌分路  
進兵防勦互用及時興屯兼備安撫所陳不爲無見陝甘防勦事  
宜是左宗棠專責李鴻章勦賊有年於東南將士性情知之最悉  
該大臣等均屬國家重臣當此邊陲未靖自應急籌長策以收底  
定之功著卽就該給事中所奏各條彼此函商務須屏除成見通  
籌全局迅速奏聞以資採擇欽此跪聆之下敬仰我

奏稿卷二十九

七

皇上眷念西陲亟籌底定至意竊維陝甘不靖山西所恃以爲固  
者黃河自塞上迤東折而南流足以陷戎馬之足耳兵從秦出由  
東而西晉防尤宜布置謹嚴毫無罅漏然後秦軍進勦無前突後  
竭之虞晉防復嚴得形格勢禁之道庶幾屏蔽寬而關鍵利大局  
固而異患銷是故欲重黃河之險固宜合秦晉以通籌而欲一秦  
晉之心又宜分防勦而并任也按山西河防自河曲保德以南夾

岸山谷迤邐有險可據前據陳湜函稱已一律修砌壘卡設險增防似西河一帶尙可無虞近奉

諭旨敕豫軍分防中路并以大支徑駐榆林接李鶴年函稱已遵調張曜宋慶各增募數營赴防是北路亦期嚴固惟綏遠歸化地界極邊薩托清等處黃流淺漫地勢平衍聞該處兵力殊不足恃定安來函亦以此爲慮此固秦晉所難代謀者也陝回被勦窮蹙鋌走草地亦在意中似宜預事防維早爲之所臣前於

陛辭後接晤李鴻章論及西事亦深知秦隴餉事太絀不能用眾而旋有簡選銳卒相助之說三品銜候補翰林院侍講學士袁保恆曾爲臣言伊故父袁甲三舊部併隸李鴻章中多可用者意欲

奏稿卷二十九

八

於淮軍中選募成軍自當一路臣甚壯之該員見在都寓可否敕下袁保恆令其赴淮選募成軍剋期入晉徑駐歸化城作爲遊勦之師相機截擊於大局實有裨益所有該軍餉需自應由李鴻章寬爲籌備李鴻章如赴新任應爲酌定的餉源源籌解方無掣肘之虞并請

敕下李鴻章妥爲籌畫山西塞外有此一軍局勢庶臻嚴密如蒙俞允則金順一軍俟宋慶到榆林後應仍回駐定邊花馬池聯絡甯條梁甯夏一帶以扼草地之衝秦之北路隴之東北晉之西北均可相庇以安矣至袁保恆已蒙

恩擢至翰林學士例得奏事如蒙

簡派所有該處軍務應否令其會同定安具摺馳報以期徑捷之處出自

聖裁所有遵

旨覆陳緣由謹據實馳奏伏乞

皇太后

皇上聖鑒訓示施行謹 奏

軍機大臣奉

旨另有旨欽此

行抵孟縣分起渡河并派員跣緝游勇片

同治七年九月二十四日

再臣於前月十九日

陛辭後二十六日起行南下九月初八日行抵河南彰德府入親軍營會師西向時因各軍製備寒衣未齊駐候四日十二日始克拔行十八日馳抵懷慶府孟縣分起渡河因河南辦工運料船隻調赴下游渡船稀少臣軍馬步二萬四千有奇戰馬車馱頭口數已逾萬按日以次渡河間值西北頂風尤難順速計尙須兩三日全軍始克畢渡由直隸拔營以來沿途皆支帳安鍋兵勇野處不入城市採購一切均照民間時價軍民相安惟入豫境以後時有游勇冒充官兵於師行前後數十里間公行剽劫卽告假弁勇亦時遭其害緣地方當四達之衢各省革勇游勇及散遣之勇易於會聚爲害商旅已派員跣緝并飭附近地方官隨時查拏懲處直隸河南秋稼豐稔民氣恬熙尙堪仰慰

慈廬謹附片陳明伏乞

聖鑒謹 奏

軍機大臣奉

旨另有旨欽此

軍機大臣字寄同治七年九月二十九日奉

上諭左宗棠奏籌防歸綏派員跣緝游勇吳坤修奏請派大員督辦省防長江皖南各釐請歸還安徽會籌開堤事宜各摺片覽奏均悉綏遠歸化地界極邊薩托清等處黃流淺漫防務極關緊要著左宗棠會商定安等嚴密防維妥爲布置該大臣請敕袁保恆選募淮軍徑駐歸化并令其會同定安奏事之處均毋庸議陝省匪勢蔓延左宗棠當統率各營迅速殄除醜類豫省游勇冒充官軍於師行前後數十里間公行剽劫弁勇亦遭其害左宗棠雖已派員搜捕李鶴年當隨時督飭地方官實力嚴拏按律懲辦皖境游勇乘機搶掠去省數里劫案迭出哥老會匪到處皆有尤慮互

奏稿卷二十九

十一

相勾結吳坤修見駐壽州未能兼顧所有省城防務著卽責成裕祿認真辦理遇有匪徒滋擾盡法懲治以靖地方山東至清淮一帶亦有游勇混迹搶掠行旅并著張之萬丁寶楨飭屬嚴拏務獲究辦吳坤修所稱皖餉支絀見聞淮軍議撤請以長江皖南釐金除每年撥歸水師三十二萬兩外其餘概歸安徽等語卽著會同藩馬新貽丁日昌吳坤修會商辦理豫省開決隋堤借道放水皖境宿州及靈泗等處必罹重災民命攸關不可不慎益加慎著會同藩馬新貽張之萬蘇廷魁李鶴年吳坤修悉心籌商妥爲辦理毋得以鄰爲壑貽害民生將此由六百里諭知會同藩左宗棠馬新貽張之萬蘇廷魁丁日昌丁寶楨李鶴年并傳諭吳坤修知之

欽此

奏稿卷二十九

三

請停各省皖捐片

同治七年九月二十四日

再臣據陝西捐餉總局詳稱陝甘餉源日涸亟盼捐款接濟惟查皖捐章程輕減異常各捐生避重就輕以致陝甘捐務毫無起色見在東南肅清皖省防軍漸次裁撤該省餉事料無庸藉助各省捐輸所有皖捐各省分局應請一律敕停俾陝甘捐務稍期應手等情前來臣覆查無異應請

旨敕部核議安徽所設各省捐局應否一律停止俾陝甘捐局不致盡成虛設謹附片具陳伏乞

聖鑒訓示施行謹奏

軍機大臣奉

奏稿卷二十九

三

旨戶部議奏欽此

軍機大臣字寄同治七年十月十七日奉

上諭李鶴年奏檄催豫軍剋期入晉遵飭張曜改赴榆林請將陝省募勇滋事員弁懲辦各摺片張曜一軍已於本月初九日北渡卽著李鶴年飛飭該提督兼程前進迅赴榆林與金順聯絡防剿以固秦晉北路并嚴催宋慶趕將舊部招集星速由豫入晉駐紮汾州以重防務該軍應需資糧等項著李鶴年先爲製備俾宋慶回豫後卽可趲行免致稽延貽誤豫軍西征餉需軍火轉運最關緊要李鶴年已派員在澤州地方設局經理并著鄭敦謹一體督飭妥辦毋令稍有缺乏懷慶府屬地方於左宗棠督師過境時突有游勇冒充官軍滋事劫搶傷人之案層見疊出該處瘡痍未復

奏稿卷二十九

四

何堪再遭擾害卽著李鶴年飭令楊長春會同地方官嚴密查拏盡法懲治以靖閭閻并著左宗棠嚴查如有隨營游勇在外滋擾者卽照軍法從事毋稍徇隱劉典以親軍缺額派副將劉秀桃參將陳鳳林赴豫招募步隊數百人充補該員等輒濫收馬步至三千餘名之眾沿途漫無約束淫掠毆搶疊斃民命闔鄉一縣被害呈訴者已一百五十餘起其他可知殊堪痛恨劉秀桃陳鳳林著卽革職并著劉典將縱勇肆擾各節逐細查明按律究治并勒令將犯事勇丁交出押解赴豫正法梟示以昭炯戒此項新募之勇到營後如須酌量遣撤務當另派妥員分起押送毋使再滋事端將此由六百里各諭令知之欽此

陝省西北兩路勦賊獲勝摺同治七年十月二十六日會西安將軍庫克吉泰署陝西巡撫劉典銜

奏爲陝省西北兩路各軍連日勦賊獲勝見籌防勦各情形恭摺

仰祈

聖鑒事竊陝甘各軍攻勦靈臺涇州一帶竄賊獲勝該逆敗退董志原并分股竄擾宜川地境撥營勦辦各情形業經臣庫克吉泰

等陳報九月二十一日洛川守將劉竹田訶知回騎數百竄至龔家原之葫蘆河劉竹田率輕騎擊之二十二夜直擣葫蘆河賊巢克之躡追至王家河賊忽回拒官軍奮威衝殺斬悍賊十餘騎而還二十九日賊騎數千由甘泉府村竄入直趨勞山分股竄及麻子街提督劉端冕所部分防甘泉道左鋪之左營總兵銜副將劉

奏稿卷二十九

五

仕祁聞警率隊至老人倉擊之斃賊不少逆勢頓挫仍由原路竄去少頃大股復從麻子街蜂擁而至劉仕祁畱總兵陳光明率三成隊守營派該營後哨列隊河溝防後路自率親兵及三哨七成隊出擊正酣戰間另股逆騎萬餘忽繞由對岸山溝衝至駱馱原將後哨重疊圍裹劉仕祁一面飛報鄜州請援一面率隊回救而山後騎步各賊併勢壓下又圍劉仕祁隊劉仕祁縱橫血戰猛氣甚厲賊欺其單旋卻旋進弁勇傷亡已多劉仕祁身帶十餘創猶手刃悍賊數名力竭而殞其前哨哨官畱陝參將會恆勝并遊擊魯桂德把總謝文泰均因翼蔽劉仕祁植立不移同沒於陣弁勇陣亡者七十餘名是日劉端冕探悉大股竄至鄜州城北二十里

之劉家岔一帶率中後兩營往勦中途得劉仕祁急報卽令副將  
喻先知率後營往援行至道左鋪見該逆正圍攻左營牆壘卽麾  
所部衝殺圍解賊遁復併力而前急趨劉仕祁戰所則已無及矣  
劉端冕將岔口村賊擊敗後率所部合隊追勦至麻子街斬殿後  
賊十數名生擒七名據供此股回逆係余馬兩偽帥率眾五萬分  
作三股一攻鄜州一竄延安一竄宜川等語訊畢斬之劉端冕令  
左後營暫駐道左鋪自率中營回鄜州十月初二日回逆大股分  
竄開武鎮相胥鎮馬蹏莊舊縣等處分防舊縣之總兵凌默發堅  
守舊縣城堡逆不得逞逆騎數千竄至牛武鎮將趨鄜州劉端冕  
聞報飛飭駐道左鋪之左後兩營准備俟該逆回竄麻子街卽出

奏稿卷二十九

六

隊截擊一面督率中前兩營及馬隊赴鄜截勦行十餘里遇逆騎  
數千飛奔而來馬隊向前衝殺斬悍賊十餘名賊瞥見我軍步隊  
大至卽回馬狂奔劉端冕督隊猛追將近牛武鎮該逆大股列陣  
平原意圖拒敵我軍排陣以進始以劈山礮向賊聚處轟擊斃賊  
百餘名繼以洋槍連環迭進戰十餘回合擊斃悍賊十餘名該逆  
漸卻官軍奮威衝殺賊益不支遂向英汪鎮鼠竄而去劉端冕仍  
率隊回鄜此九月二十九月初二等日劉端冕勦賊獲勝情形  
也其由英汪鎮竄至吉子嶮之賊已及洛川屬之交口鋪一帶提  
督周紹濂率中後兩營於初三日馳赴安子頭會合所部左營扼  
之交口擊敗之賊復分兩股遁去其一股竄赴洛川東北兩鄉圍

攻樂安金牌黃章草地各寨適<sub>臣</sub>劉典調赴洛川勦賊之員外郎  
銜中書吳士邁先日赶到縣境旋令禮營哨官都司李耀卿等率  
隊赴援草地民寨令副將謝盛柎率義營援黃章民寨令遊擊余  
清勝率智營援金牌民寨令副將劉竹田率鎮西營提督銜邱時  
成率馬隊參將劉厚福率仁營援樂安民寨初三日卯刻分四路  
而進劉竹田等行近樂安寨忽聞該寨已於先日被賊攻破劉竹  
田卽率所部直撲南門寨中踞逆方列械抵抗因見仁營與馬隊  
由左右抄出恐斷後路遂盡棄糧畜由北門竄去旋復勒馬擁眾  
拒敵劉竹田劉厚福邱時成等三面夾擊斃賊多名賊遂北竄謝  
盛柎余清勝至黃章金牌等寨賊望見旂幟亦卽解圍北竄李耀

奏稿卷二十九

七

卿等至草地該逆正在環攻民寨各路賊併集一處李耀卿大  
呼陷陣賊勢披靡且戰且走少頃仁義智營與馬隊鎮西各營躡  
蹤追至洛川縣知縣王浩廓州州判周貴庠各督團丁亦到四面  
夾擊斃賊多名奪獲糧畜甚夥該逆由舊縣一帶竄去我軍追至  
田家村忽據探報東鄉有回騎數千亦在圍攻民寨遂令收隊回  
援適東鄉槐柏鎮塔子坪五十村童張彭溪北頃南頃各寨民人  
來營請援吳士邁卽畱邱時成馬隊及劉竹田鎮西營畱防北路  
兼顧糧運令仁義禮智四營於初四日赴東鄉進勦行六十餘里  
至槐柏鎮已近黃昏該逆聞風均退向塔子坪一帶塔子坪距槐  
柏十五里北頃距槐柏二十五里南頃距槐柏三十里爲該逆回

竄必由之路遂傳令二更造飯三更出隊維時總兵朱德樹知縣張遂生率信誠兩營隊伍亦至遂分三路進剿禮仁兩營進剿塔子坪義營與知縣王浩率團丁進剿北頃信誠兩營進剿南頃智營伏於南頃三里外之溝口并派親兵兩哨伏於溝口左右五更時五營齊撲大小槍礮連環轟擊聲震山谷逆賊倉皇失措莫知所之轟斃焚斃墮崖谷冑樹石而斃者不計其數其由各路竄遁之賊甫近溝口復經智營伏兵邀擊鮮得脫者計斃賊約二千有奇奪獲馬騾千餘匹洋槍二十三杆生擒四十三名訊明斬之其各路糧畜先派同知李謙升知縣蕭啟基從丸羅日章縣丞曾貴和分督親兵四處收集隨傳就近各寨民自行搬取糧食認領耕

奏稿卷二十九

文

牛當時未經認領者卽交洛川縣散給貧農惟戰馬騾驢畱賞兵勇此十月初三四等日吳士邁一軍剿賊洛川克獲大勝之情形也其由吉子嶮退竄者初四日提督周紹濂飭副將周玉林率隊赴安子頭與左營合駐初六日逆騎數百竄至石家峴大股數千聚踞古樓村周紹濂卽夜令副將劉甫田率右營於初七日出隊石家峴令前左兩營總兵董玉春及周玉林各率所部取道阿當寨由右路直趨古樓村除畱隊守中部城外自率中營督同參將毛正明率後營中右後三哨取道王村由左路進赴隆坊令總兵李良穆分率後營前左兩哨扼伏王村要隘以防石家峴竄逆周紹濂抵隆坊時前左兩營已與該逆接仗兩路列隊槍礮環施該

逆漫山徧野躍馬衝撲周紹濂率中營四哨由右向古樓村包抄前進飭毛正明率所部及守備周崑率中營後哨由左進維時前左兩營已擊斃當先悍逆十餘名落馬賊見我軍左右抄出各奔勇銳氣百倍進戰愈力總兵趙興雲副將陳高華都司周曙良各率隊於右路奮勇衝突而前毛正明下馬挺矛殺入副將劉鳳舞遊擊周雲吉守備周崑率隊隨之兩路槍礮交轟賊益不支紛向馬鞍村原路竄去計共斃賊三百餘名會雪勢愈勁山路凝滑收隊而返此十月初七日周紹濂剿賊中部獲勝情形也同時竄擾西路者回首馮阿渾郭阿渾張萬寶馬正和馬長順馬文舉等於十月初一日由董志原糾黨內犯竄至隴州柳家河一帶連互四

奏稿卷二十九

九

五十里初三日直逼城下鹽運使銜試用道候補知府喻步蓮率所部義勝三營截擊該逆且戰且走分爲兩股一股萬餘人由隴城西走曹家灣折竄州南白家河朝天坡等處一股七八千人由隴城東走折竄州南蘇家灣臨林川八渡等處并分屯杜陽迤迤下趨悍騎駛至距汧陽二十五里之寇家河而自隴城南竄之賊尙紛至未已甘肅臬司張岳齡慮上良朝那之賊由新集鎮併犯大灣嶺派參將胡弼武帶隊馳赴隴頭伏龍等堡以遏闖入馮坊河之路自督各營扼剿於寇家河初五日入渡之賊竄擾新街鎮零騎擾至寶雞之縣頭鎮初六日道員魏光燾率馬步七營馳赴汧陽會同張岳齡進剿初七日出隊行至草碧灘遇賊騎擊之返

奔忽大雨如注將士衣履盡溼遂暫駐稍憩是日署漢中鎮總兵李輝武亦由寶雞防所率部馳抵新街初八日大雪難行探報回逆有由上良東趨者李輝武恐其乘虛闖入寶鳳仍率隊回寶雞張岳齡等訶賊尙踞隴境初九日雪止乘霧進抵杜陽查探該處係逆酋張萬寶所帶聞風宵遁其自入渡竄出者因官軍攔截仍伏山中未刻各營抵隴州與義勝各營聯絡分路探防諸賊以官軍大集先後乘夜出竄自南而西距州城十餘里如繩如蟻絡繹不絕知府喻步蓮獲賊探據供馮馬各酋原擬飽掠後由杜陽草碧分隊回巢不料官軍大至祇得傍州城奪路夜竄喻步蓮密派勇丁二百名潛伏要隘截之斬獲頗多初十日卯刻張岳齡率所

奏稿卷二十九

三

部出西門至溫水溝見該逆滿布川原馱糧絡繹向西北柳家河一路而走斷後騎賊三千餘人一見官軍卽齊隊衝突張岳齡派副將李獻厚知縣鍾顯謨率中營從右進總兵黃儲寶州判唐楚榮率左營從左進總兵蕭賞謙府經歷余修鳳率右營從平頭原下擊親督知縣余家珍帶親兵繼之道員魏光燾派總兵吳禱德周勝元各率馬隊踵至張兩翼包抄該逆分途抗拒都司張佐廷率十餘騎首先突陣轟斃馬賊多名參將陳清輝左手受矛傷力戰不退吳禱德等馬隊奮勇抄截平江營劈山礮中轟逆勢不支紛紛敗潰然猶時散時聚奔而復戰正在追殺間忽把關口橫出一股前來迎敵適喻步蓮繼至整隊當之總兵蕭羣魁擊其左參

將龔曉亭擊其右參將劉寶元敵其中喻步遵自率撫標馬隊及中營親兵緊相策應該處深溝陡岸逆騎不能馳騁亟以排礮轟之逆眾擁擠自相踐踏我軍齊隊進擊該逆棄械狂奔劉寶元率馬勇跟追約三里許爲該逆伏騎所困總兵蕭羣魁等率哨弁遊擊張金榜千總彭雲開外委魯大元策馬赴援步隊續至該逆始大敗而逃於是恪靖馬隊逐北谷中平江義勝各營躡蹤原上遇賊卽殺伏屍縱橫雪地爲赤直至距城四十餘里之李家河蘇家圍始行收隊魏光燾於先夜五更率武威升奇各營出隊向南原潛伏天色甫明該逆果由山內蜂擁而來爲數不下萬餘伺其過半卽率伏兵齊出截擊該逆猝不及防紛紛驚潰立斬四十餘名

奏稿卷二十九

三

羣逆忽麤聚併力轉鬪我軍列陣偪勒槍礮齊施悍黨下馬持矛猛撲各將士奮力相搏鏖戰逾時升用提督左日升總兵于奇泮同副將石茂林陳家貴遊擊張清和于維槐等各手刃數賊該逆敗近河岸猶敢回拒升奇兩營協力奮擊賊乃大敗左日升等追殺二十里至米家山魏光燾督武威中後兩營追至玉村川逆酋立馬橫刀喉黨死鬪魏光燾飭總兵熊道濱參將王政和由小路抄賊之後參將何昌梓由大路擊賊之前兩面夾攻遊擊魏紀鑿率親兵隨馬隊陣斬賊酋一名賊益震駭追殺三十里至余家堡沿途擒斬纍纍日晚始行收隊張岳齡自柳家河折回州城甫抵太平堡得悉武威等軍獲勝追奔遂列陣南原至此始行會合收

隊回營尙恐南山內外餘匪伏匿爲患張岳齡等於十一日督同各營官帶隊分路入山搜捕均有擒斬隴州境內一律肅清是役計共殺賊二千有奇生擒三百五十七名奪騾馬千數百匹拋棄糧食填塞道路均任窮民收取訊據擒賊供稱逆酋聞大軍十萬西來亟圖廣擄畜糧爲分巢抗拒之計因窺隴州兵單可以飽掠不料鳳郡汧寶各軍迅集致受此挫訊畢分別斬釋此十月初四初七初九初十一等日張岳齡魏光燾喻步蓮等勦賊大獲勝仗之實在情形也所有此次尤爲出力之總兵雄勇巴圖魯黃儲寶畱江補用總兵蕭賞謙請

賞加提督銜總兵銜畱陝補用副將節勇巴圖魯李獻厚請以總

奏稿卷二十九

三

兵仍畱陝西補用花翎湖南補用都司張佐廷請以遊擊仍歸湖南遇缺卽補藍翎運同銜遇缺儘先選用知縣鍾顯謨請以同知儘先選用同知銜藍翎州吏目補用州判唐楚榮請補州判後以知縣遇缺卽選升用提督補用總兵左日升提督銜補用總兵于奇泮均請

旨交部從優議敘福建記名總兵摯勇巴圖魯吳禧德福建儘先補用總兵熊道濱均請

賞加提督銜補用總兵周勝元兩湖儘先補用副將陳家貴均請賞給勇號畱閩儘先補用副將石茂林請

賞加總兵銜副將銜卽選參將何昌梓花翎儘先補用參將王政

和副將銜儘先補用參將劉洪勝均請以副將儘先補用福建補用遊擊張清和花翎湖南補用遊擊魏紀鋈均請以參將仍畱原省補用花翎儘先補用遊擊于維槐請以參將儘先補用總兵蕭羣魁副將銜四川補用參將龔曉亭副將銜參將劉寶元均請賞給勇號副將銜儘先參將嚴昭順請以副將儘先補用參將銜儘先補用遊擊張金榜請以參將儘先補用并加副將銜藍翎千總彭雲開請以守備儘先補用儘先外委魯大元請以把總儘先補用并

賞戴藍翎以昭激勸其力戰捐軀之總兵銜儘先補用副將劉仕祁人素樸勇遇賊大股蜂擁而至縱橫血戰力竭捐軀深堪憫惜

奏稿卷二十九

三

應請

旨交部照總兵例議卹畱陝補用參將會恆勝遊擊魯桂德把總謝文泰力衛主將卒以身殉應請

敕部照例議卹以慰忠魂所有西北兩路官軍獲勝情形謹合詞馳陳伏乞

皇太后

皇上聖鑒訓示施行謹 奏

同治七年十一月初三日內閣奉

上諭左宗棠等奏官軍分路剿賊疊勝請將出力陣亡員弁懇恩獎勵賜卹一摺甘肅董志原踞賊分股竄擾陝西鄜州洛川中部

各境經提督劉端冕周紹濂中書吳士邁等先後截剿連日獲勝其竄擾西路賊匪直逼隴州亦經臬司張岳齡等督率各軍協力奮擊殺賊二千餘名生擒三百餘名奪獲騾馬千數百匹隴州境內一律肅清剿辦尙爲得手仍著左宗棠等督飭各軍乘勝進剿迅掃賊氛此次尤爲出力之總兵黃儲寶蕭賞謙均著賞加提督銜副將李獻厚著以總兵仍畱陝西補用都司張佐廷著以遊擊仍歸湖南遇缺卽補知縣鍾顯謨著以同知儘先選用州判唐楚榮著俟補州判後以知縣遇缺卽選提督左日升總兵于奇泮均著交部從優議敘總兵吳禧德熊道濱均著賞加提督銜周勝元著賞給勝勇巴圖魯名號副將陳家貴著賞給鋒勇巴圖魯名號

奏稿卷二十九

五

石茂林著賞加總兵銜參將何昌梓王政和劉洪勝均著以副將儘先補用福建遊擊張清和湖南遊擊魏紀鋆均著以參將仍畱原省補用遊擊于維槐著以參將儘先補用總兵蕭羣魁著賞給勛勇巴圖魯名號參將龔曉亭著賞給傑勇巴圖魯名號劉寶元著賞給彰勇巴圖魯名號嚴昭順著以副將儘先補用遊擊張金榜著以參將儘先補用并賞加副將銜千總彭雲開著以守備儘先補用外委魯大元著以把總儘先補用并賞戴藍翎陣亡之總兵銜副將劉仕祁著交部照總兵例議卹參將曾恆勝遊擊魯桂德把總謝文泰均著照例議卹該部知道欽此

劉端冕截剿董志原回逆續獲大勝片

同治七年十月二十六日  
會西安將軍庫克吉泰署

陝西巡撫  
劉典銜

再正拜摺間復接統領楚軍前路記名提督劉端冕稟報十月初九日訶知洛川逆回經吳士邁擊敗後復回竄鄜州境袁家寨開武鎮相胥鎮等處夜攻寨堡劉端冕卽飭總兵陳光明率中前左三營三成隊伍畱防鄜城近隘飭右營及鎮西營於初十日馳赴舊縣會剿親率中前兩營由相胥鎮前進午刻馳抵舊縣謀報賊尙踞袁家寨開武鎮未動適大雪紛飛頃刻盈尺官軍亦難前進是夜四更雪止出隊十一日卯刻抵袁家寨比飭右營鎮西營繞高原下扼賊東竄中前兩營從正路進馬隊列高原上防賊包抄

奏稿卷二十九

五

天明直偪寨前賊聞鼓聲大震倉猝出寨拒敵官軍奮威衝殺立斬悍回百餘名賊騎因雪擁山徑顛蹶不前官軍併力蹙之窘而東趨適遇右營鎮西營從寨東兜剿而上槍礮齊轟斃賊不少賊向開武鎮北竄官軍乘勝躡追沿途擒斬尤眾是夜收隊袁家寨四鼓出隊十二日黎明擊之開武鎮鏖戰三時追戰十餘里斬賊四百餘級生擒賊目羅平兒等四十七名賊向屈家灣英汪鎮一路遁走劉端冕慮其將由勞山麻子街道左鋪舊路歸巢飭右營鎮西營仍回原防自率中前兩營於十三日回鄜飭駐甘泉之後營准備截擊十四日戌刻賊果由麻子街道左鋪兩路回竄十五日中前兩營及馬隊五更出隊十六日甫抵道左鋪賊正搶渡官

軍薄之涸斃中流者無數其由麻子街竄出之賊經後營截擊擒斬亦多計劉端冕一軍十一十二二十五等日三戰共陣斬悍回千餘名奪獲糧食牛驢旂幟槍矛無數訊據生擒賊目等供回酋楊文治馬生彥等擬攻破韓城作巢穴聞大軍自同州來遂決計西竄歸巢十二日開武鎮之戰楊文治左脅中礮子傷未知其死活也據此則由郿甘東竄回逆疊經痛剿兇鋒亦少挫矣所有劉端冕一軍截剿董志原東竄回逆續獲大勝情形謹附片陳明伏乞聖鑒謹 奏

軍機大臣奉

旨另有旨欽此

劉厚基進勦清澗兩獲大勝并成定康克獲奇捷片

同治七年十月二十六日

會西安將軍庫克吉泰  
署陝西巡撫劉典銜

再陝西延綏一帶甘肅土匪董福祥李登等不時出沒股數甚夥除扈彰一股業於延安就撫外餘皆四出竄擾巖谷之間蜂屯蟻聚號稱十餘萬游勇潰卒黨附之者計亦不止數千據延榆綏鎮總兵劉厚基稟報由延安赴榆林署任行抵清澗訶知土匪於縣境攻寨掠食勢日猖獗遂擬駐營搜勦九月二十五日諜報縣城東北四十里有土匪大股圍攻師家溝一帶民寨甚急劉厚基即派隊分道馳援副將李作福鄴登科都司姚發義先進乘其不備擊之斃賊二三百名羣匪敗退郝寨王寨圍解追過一山大股馬

奏稿卷二十九

毛

步各匪蜂擁而至劉厚基令總兵田玉廣提督王雲孚遊擊陳國珍分三路齊進親率馬隊繼之參將李恆勝張正喜鄧萬盛等首先陷陣立斬賊目數名賊勢稍卻劉厚基縱馬衝擊號鼓齊鳴三路畢集槍礮止刀矛接賊屍徧野官軍奮威衝殺銳氣百踣敗賊擁擠墮崖墜澗者無算逐北至師家溝復前追十餘里始咀隊還計共斃賊千餘名生擒三百餘名奪獲馬騾驢千餘頭牛羊糧食甚夥訊據匪目李玉青余貴保供此股匪目爲匪首董福祥所統之李雙良李棟均甘肅固原州人此次由綏德州之雙湖峪入犯訊畢斬之是夜探報另股回眾正在九里山掠食勦敗之匪已到曹家溝圖與合勢攻掠民寨劉厚基卽令各營向九里山進勦二

十七日卯刻抵奧林寺分遣王雲孚陳國珍先由左右山路急繞賊後田玉廣由中路迎擊馬隊繼之鄧萬盛及清澗縣知縣趙聿灝帶練勇扼各隘口匪眾聞官軍且至率黨向前抗拒我軍堅持不動約一時許劉厚基度王雲孚等已出其後親督中路馬步各隊併力進擊正鏖戰間陣後槍礮齊震匪眾知官軍已繞出其後倉皇紛竄官軍四面縱擊賊遇卽斃計共斬賊千餘名生擒百餘名獲騾馬二百餘匹追過曹家溝二十里至柱腰坪乃還此九月二十六七等日劉厚基進剿清澗土匪兩獲大勝實在情形也署綏德州知州道銜知府成定康函報九月二十八九等日董福祥李登等率眾數萬句結回酋馬天喜突犯州境成定康得報後密

奏稿卷二十九

庚

率所部三營隊伍伏於田莊鎮之薛家寨十月初一日黎明大股驟至成定康出其不意麾所部三面截擊賊駭而奔官軍槍礮刀矛併進霎時賊屍枕藉并生擒馬天喜等百餘人計共殺賊四千有奇奪獲騾馬二千有奇克獲奇捷其詳細情形尙未據稟報然成定康曾在臣宗棠軍營辦理營務有年習知其血性過人素好奇計信其所陳非妄也初四日劉厚基飭王雲孚陳國珍及副將胥榮富迎擊募家河掠食之匪斃匪數百生擒匪目陳永思等七十五名奪獲旂幟軍械數百件騾驢四百餘匹初六日搜剿柴家坂攻寨之匪匪眾解圍鼠竄劉厚基於初八日進綏德州所有東北路剿匪疊獲大勝情形謹據實馳陳伏乞

聖鑒謹 奏

軍機大臣奉

旨另有旨欽此

奏稿卷二十九

完

恭報旋陝日期及會籌調度情形摺

同治七年十月二十六日

奏爲恭報

微臣

旋陝日期及會籌調度情形仰祈

聖鑒事竊臣於九月二十七日孟津渡河後按站趨行沿途得各路軍報知回土各匪雖肆鴟張而各路布置旣得地勢將領復極一時之選大局穩固差可無虞私懷稍慰十三日行抵西安庫克吉泰劉典率同副都統司道各員跪請

聖安畢

臣

晤商一切連日會籌軍事調度軍食而甘肅提督高連

陞署漢中鎮總兵李輝武道員黃鼎魏光燾聞

臣

西還各自防所

來見稟商軍事

臣

比逐一詳詢益知劉典運籌之審陝西全局東

北延榆綏一帶爲甘肅土匪所侵擾人數甚多潰勇游勇飢民居

奏稿卷二十九

三

其大半亦有甘回附麗其中西南則陝回盤踞董志原老巢號稱十八營其地本甘肅甯州轄境北接慶陽南連邠鳳東北直達鄜延陝回而外甘回滇回之嗜亂無歸者漢民之被脅從教者亦屢雜其中合計兩路回土各匪人數近二十萬幸將士一心每戰皆捷斬馘過當

皇威暢而人心定大局應可無虞所有近時各軍獲勝情形謹會銜馳報見與劉典熟議乘勝進徧分途勦辦以速戎機高連陞一軍分營進駐廟莊楊家店一帶周紹濂一軍分營進紮雙柳樹魏光燾一軍由張村驛進王家角以漸達慶陽劉端冕一軍仍駐廊州甘泉以扼東西關鍵此爲中北路之兵調吳士邁全軍赴鳳翔

與黃鼎邠州之軍張岳齡喻步蓮汧隴之軍李輝武寶雞之軍相  
聯絡臣復調步隊兩營馬隊八營赴鳳翔預備會剿此爲西南路

之兵兩路皆所以剿回也吳士邁劉端冕旣剿敗楊馬諸回酋鄜

州洛川甘泉肅清劉厚基成定康旣剿敗高李諸土匪延長延川

清澗綏德亦漸有肅清之望臣見調郭運昌所部卓勝馬步八營

由同州韓城赴宜川以進延長適郭運昌暴得寒疾甚重行至同

州馳稟請假見令提督蔡光武代領其軍二十三日始拔營前進

其劉松山全軍見在洛陽整理尙須時日臣擬飭其由茅津渡河

入山西乘冰橋赴陝以期周密見據韓城縣稟禹門以上冰橋早

成雖晉防今歲增兵修堡守禦較嚴土匪伎倆遠不如捻然臣親

奏稿卷二十九

三

承

慈諭勦賊須由東而西不敢不慎益加慎其榆林有金順之馬步

十二營改兵爲勇四營兵力本不爲單惟金順所部終須移駐靖

遠一帶頃接張曜稟初九日始由汴啟行計抵榆林尙須月餘非

俟張曜到後金順不能移赴靖遠且所部英禮十營慮不足恃也

此東北路北路之兵尙待綢繆者臣前疏請增歸綏之軍未荷

俞允竊慮終須稍留

聖意頃據黃鼎面稟董志原回巢所需百貨近從金積堡遠自歸

化城轉販而來上年包頭地方曾有回逆買馬之事似所稟未盡

無因大抵陝甘之患未平歸綏之防斷不宜弛蒙兵綠營駐防之

兵均難深恃而地當

京畿右臂設險宜先明宣府大同邊防并重良非無故也伏乞  
聖慈曲垂鑒納臣所帶親兵一營後路五營吉林馬隊三起見結  
營西安城西擬俟各軍到防河東之餉提到再相南北兩路緩急  
赴之至回土各匪聞臣軍回陝亦頗懷震懼見據各路稟報有移  
巢者有乞撫者然皆未足信惟當不執成見慎以圖之以求仰紓  
聖廬所有會籌布置情形謹據實馳奏伏乞

皇太后

皇上聖鑒訓示謹 奏

軍機大臣奉

奏稿卷二十九

旨另有旨欽此

三

軍機大臣字寄同治七年十一月初三日奉

上諭左宗棠等奏陝省西北兩路勦賊獲勝情形并劉端冕截勦董志原東竄回逆續獲大勝及東北路勦匪獲勝情形暨該大臣抵陝籌度軍情鄭敦謹奏賊犯河干越河擊退飭兵勇嚴防各摺片已明降諭旨將陝省出力之總兵黃儲寶等獎敘陣亡副將劉仕祁等議卹矣此次劉端冕吳士邁等軍擊敗鄜州洛川等處竄回周紹濂擊敗中部賊匪張岳齡等擊敗隴州等處竄匪其由鄜東竄回逆復經劉端冕截勦大勝延綏一帶土匪亦經劉厚基成定康進勦獲勝鄜州等處已經肅清延長等州縣亦漸有肅清之望左宗棠行抵西安著與庫克吉泰劉典會商調度乘此得手之

奏稿卷二十九

三

際督軍分途進勦所有高連陞等軍卽著照該大臣所擬調撥扼紮以資分勦陝省土回各匪雖以董志原爲淵藪而北路高樹嶺等處有回匪窺伺河干當此冰橋已結尤當加意截其東竄之路歸綏一帶防兵不多朝廷亦深慮其地廣兵單第恐淮軍前往扼紮人地不甚相宜著定安等隨時斟酌情形如果兵力不敷防勦匪已三月經官軍擊退難保不狡焉思逞總兵馬陞本係專防河保一路見在添調官兵千名卽著鄭敦謹督飭該總兵認真梭巡遇賊卽擊并著嚴飭陳湜在中路巡防不得稍有疎忽張曜一軍已抵汾境倘吉鄉有警准其酌畱數營以厚兵力宋慶前已赴豫著李

鶴年仍遵前旨催令該提督統率所部迅速入晉扼紮汾州一帶  
毋稍延緩郭運昌見在患病自應暫行調理前據英翰奏稱郭寶  
昌傷疾已愈添兵助剿卽著吳坤修催令剋期赴陝并著李鶴年  
檄令星夜進行沿途勿稍耽延該提督素稱勇敢諒不肯稍有逗  
畱也陝西土回各匪雖有畏懼乞撫各情該將領等亦同心剿賊  
但當不執成見以收實效左宗棠久在軍中熟悉情偽必能調度  
合宜以副委任也將此由六百里諭知左宗棠庫克吉泰定安鄭  
敦謹李鶴年劉典桂成并傳諭吳坤修知之欽此

道員支款浮濫請

旨革職片

同治七年十月二十六日會署陝西巡撫劉典銜

再甘肅平慶涇道彭思會

臣

上年以慶涇各軍支發糧餉需人飭

該道在甘肅後路糧臺領銀三萬兩帶赴慶涇辦理支應該道行

抵乾州卽逗畱不前

臣

劉典因雷營糧餉缺乏檄催該道前進并

飭將所領銀兩造報以憑核奪嗣據甘肅後路糧臺陝西布政使

林壽圖詳稱查閱該道冊造各款每多浮濫駐乾三月購糧僅一

千七百餘石每月開銷委員差弁等薪糧銀三百餘兩至五百餘

兩不等火食雜費銀多至一百四五十兩而例不准開銷之犒賞

製買及浮招護臺勇丁等項開銷爲數尙復不少其於固原提督

雷正綰營務處副將張維義兩次支銀三千兩并未接有雷正綰

奏稿卷二十九

五

印領該道違行發給尤屬不合等情前來

臣

查該道才具平庸不

堪造就復敢任意浮濫罔顧時艱實屬鄙謬已極除責令將經手

款目核實報銷查有違例應付著落賠繳外相應據實參劾請

旨將平慶涇道彭思會革職以儆庸妄而重餉糈謹附片具陳伏

乞

聖鑒訓示施行謹

奏

同治七年十一月初三日內閣奉

上諭左宗棠奏道員支款浮濫請旨革職等語甘肅平慶涇道彭

思會會在甘肅後路糧臺領帶餉銀沿途逗畱冊造支應各款率

多浮濫實屬謬妄彭思會著卽行革職并著左宗棠飭令將經手

此  
款目核實報銷如有違例應付各情卽著照數賠繳該部知道欽

奏稿卷二十九

奏

各路擊賊獲勝并分由山西兜剿先固河防摺同治七年十一月二十一日會西安  
將軍庫克吉泰署  
陝西巡撫劉典銜

奏爲各路擊賊獲勝見籌勦辦并分由山西兜剿先固河防仰祈  
聖鑒事竊陝西西北兩路勦賊獲勝十月十五日以前戰事業經  
會銜馳報所有署綏德州知州成定康十月初一日大破田莊鎮  
薛家寨回土各匪已據其函報馳陳嗣接成定康續稟詳細情形  
悉與函報無異初六日土匪頭目李雙良瞰延榆綏鎮總兵劉厚  
基將赴綏德妄圖截取輜重襲攻劉厚基畱駐田莊之提督王雲  
孚營壘初七日大股回土各匪蜂擁倏至王雲孚出隊攻擊眾寡  
不敵爲賊所敗憑壘固守賊眾數萬肉薄壘外併力環攻一晝夜

奏稿卷二十九

毛

不退王雲孚誓死拒守槍矛殪賊甚多而弁丁傷亡者已數十計  
因遣人於薄暮由賊中穿出赴綏德求援成定康聞警傳令飽食  
出隊卽夜三鼓親率所部及都司殷忠廷由華家灣進飭喻先恕  
戴光明由子柏灣進約銜枚急走度行近田莊見火箭上射卽併  
力猛進卻者斬將近五鼓距田莊約四五里聞槍礮聲緊知賊攻  
壘甚急火箭上射兩路併進又二里山右斜徑旁通飭殷忠廷設  
伏谷口防抄尾之賊成定康自率所部與左路衝殺而出賊見援  
軍逼近果分股自斜徑抄來殷忠廷扼之斃賊數十名騎賊先敗  
成定康及喻先恕戴光明兩路奮威衝殺天明劉厚基所遣援軍  
遊擊李萬盛亦至王雲孚見援軍四集率所部從壘中躍出各營

併力環擊銳氣百倍追殺二十餘里斃賊二千餘名生擒百餘名  
奪獲馬匹旂械無算自此次痛剿之後綏德州附近六七十里地  
方已無賊蹤其雙湖峪三皇茆老巢之賊移踞周家嶮李家河兩  
處時分股竄擾清澗米脂縣境十月二十六七等日成定康率各  
營進駐綏德吳堡交壤之義合鎮賊望風而竄成定康以米脂清  
澗尚有賊出沒州城未可解嚴仍卽收隊回州二十九日署吳堡  
縣知縣呂懋勛報有馬步賊眾數千回竄縣屬霍家溝應牛寨兩  
寨旋被攻陷成定康適患寒疾立飭福建候補同知陳瑞芝率各  
營由義合鎮進剿十一月初一夜師抵應牛寨殷忠廷突襲寨後  
斬關而入斬賊數十級賊倉皇出走寨外各營挺矛攢刺斃賊極

奏稿卷二十九

五

多初二日黎明乘勝進圍霍家溝寨亦一鼓而下其詳細情形尙  
未據稟報惟同時清澗縣亦有賊攻撲成定康之軍仍須返旆而  
南急援清澗此綏德一軍連獲大勝實在情形也其延安東北一  
帶時有甘肅土匪竄擾十月十二日記名總兵劉厚填幫帶刑部  
主事周瑞松詞知賊圍攻劉家寨甚急是日由府城拔隊行八十  
里抵何家寨卽夜五鼓潛師急進行至距劉家寨五里溝口遇賊  
奪其瞭望大旂殺賊二名行里許有賊二三百列隊川口官軍大  
呼衝入立斬數十級生擒匪黨呂興福等七名餘皆紛潰劉家寨  
之圍遂解乘勝整隊前進行過一山騎賊五六百飛奔迎戰副將  
黃超羣陳振贊等躍馬陷陣立斬賊目一名而奪其馬訊據生賊

知騎馬賊日係偽營官李霸四川潰卒也羣賊喪膽鼠竄官軍長驅疾追前途遇賊六七千劉厚填飭礮隊分起轟擊斃騎賊五名賊皆奔潰復整隊壓之羣賊因山險路窄擠墮巖澗者不計其數日暮收隊計共陣斬三百餘名生擒數十名奪獲騾馬七十餘匹牛驢三千餘頭餘賊遁回定邊縣新城老巢劉厚填等以距延安甚遠收隊回郡此延安一軍擊賊獲勝情形也甘泉鄜州地居陝省北路之中爲董志原回逆東西奔竄衝要記名提督劉端冕率所部駐鄜派副將喻先知率後營填紮甘泉以資扼截十月三十日探報甘泉屬之高家哨靈溝各有由董志原出竄之賊約六七千人突至圖撲城垣二鼓賊至喻先知率弁勇憑城以待昏夜槍

奏稿卷二十九

五

礮轟擊賊知有備卽時引還黎明輕騎復至喻先知出城迎擊斃賊數十名賊仍卻退而遠望塵氛大起知後有大股虜至一面收隊回城一面馳告劉端冕迅速赴援初一夜羣賊復至城下呼噪攻撲畱陝副將喻經魁副將黎思齊周茂林及各弁勇植立垛口開槍礮轟擊斃賊不知多少其悍賊冒死攀梯及頭頂板片登城者甫及垛口輒經官軍揮刃砍下賊氣益沮然猶在近城窺伺未遽退也黎明城南角聲隱隱頃刻劉端冕率馬步大隊夾河馳至城上歡聲雷動劉端冕知賊猶未遁卽傳令管帶前營畱陝知縣邵杜上太和山趨左路自率中營趨右路鼓聲起整隊猛進賊駭而奔喻先知開城出隊復從北路截之三路併力窮追至高家哨

乃令收隊計是役共斃賊七八百名生擒王虎兒等二十一名軍前正法餘賊分竄洛川白水澄城地界適道員魏光燾遵前檄率所部由鄜州進王家角行至蒲城尋蹤掩擊臣宗棠亦飭提督蔡光武帶卓勝馬步全軍由韓城出宜川截其乘冰東竄之路而與魏光燾收夾攻之功賊知大軍四集遽從澄城馮原鎮遁去此甘泉殺賊解圍實在情形也其另股回逆同時竄犯邠州麟遊蔓及汧隴署邠州知州喻兆圭稟十一月初四日已刻州西之停口堡一帶突來騎賊數百直衝至大佛寺里許之七里灣道員黃鼎飭所部新捷營迎剿鏖戰良久擬保千總張吉珍陣亡弁勇傷亡數名遊擊何占元馳往策應賊欺官軍甚單直前搏戰正相持間適

奏稿卷二十九

甲

存城各營隊伍踵至賊卽向南原竄去黃鼎飭副後營及馬隊躡蹤緊追初八日抵拜河賊方攻太白堡見官軍掩至卽解圍鼠竄初九日追至雷家堡則賊已由停口竄去矣其竄擾汧陽者甘肅臬司張岳齡飭參將胡弼武擊之初九日遇賊黃蒿灣伏兵突出首先刺斃紅衣賊目一名落馬胡弼武率隊急擊斃賊多名追至邱家莊收隊此邠州汧陽擊賊獲勝情形也竊維陝西兵事東北延榆綏一帶土匪董福祥李登等股及甘回蘇阿渾等不時竄擾近日賊蹤偏注米脂葭州迤北神木府谷地界西南自邠州以至邠鳳陝回不時竄擾而甘回亦有時附入其中賊蹤雖蔓延千數百里人數尚多至二十餘萬然屢敗之餘勢均衰蹙如山西能扼

其東趨甘肅能扼其西竄則秦軍分途勦辦亦無難就地殲除所慮各省兵力難齊賊匪乘虛輒入將有防不勝防勦不勝勦者臣等謹就目前籌畫情形分別陳之秦之東北所恃黃河天險與晉共之今歲冰橋凝結較早晉軍備多力分誠恐百密一疏貽誤大局

諭旨敕張曜由河曲保德渡河入榆林宋慶由豫渡河入晉扼汾州晉之西防固已嚴密計張曜此時可以馳抵河保矣惟宋慶尙無入晉之期臣宗棠前檄劉松山馬步全軍由陝州茅津渡河入晉徑赴汾州乘冰渡河入陝據劉松山呈報十二日全軍始克渡畢計此時可抵平陽一帶其到汾州在宋慶之前擬飛檄劉松山

奏稿卷二十九

聖

到汾後於河之西岸擇地駐紮廣購軍糧一面探聽北路一帶軍情自酌進止如河保迤南晉防穩固則乘冰赴綏德榆林進勦否則北向以赴戎機此軍以固晉爲主不必以赴陝爲急也其宋慶之軍可由太原北趨甯武朔平一帶爲歸綏後勁如歸綏有警亦可就近赴之汾防既有劉松山兼顧則宋慶似可無庸駐汾應請敕下山西撫臣傳諭宋慶酌量辦理以期均布周妥其陝回十八營踞董志原爲老巢食竭力殫四出剽掠其求撫也每以無糧爲詞而於如何安插永遠不侵不叛一切事宜未能據實傾吐各路探稟回眾有北竄金積堡西竄甘肅之議近亦有移眷口入平涼者臣等前摺所籌布置情形原爲偏巢會勦起見見正籌商安營

遞運軍糧然後併力前進乃爲穩慎秦中用兵之難迥異他方者  
以此大致以杜其北竄爲要不能保其必不西竄也所有各路戰  
勝及見籌布置情形謹合詞馳奏伏乞

皇太后

皇上聖鑒訓示施行謹 奏

軍機大臣奉

旨另有旨欽此

奏稿卷二十九

聖

老湘全軍額餉領項請 敕兩江督臣照舊解支摺同治七年十一月廿一日

奏爲劉松山老湘全軍餉項欠缺雜款無著請

旨敕下兩江督臣照舊解支以符定案事竊臣欽奉同治七年十

月二十三日

上諭會國藩奏老湘營軍餉仍歸江蘇接濟英翰等奏籌撥西征軍餉酌定轉運章程各摺片劉松山所統老湘營餉項向由江南供支該軍見在西征所有餉項自應仍歸江蘇接濟卽著馬新貽丁日昌每月協撥該軍餉銀六萬兩以資飽騰欽此欽遵在案當卽恭錄行知該軍去後茲據統領老湘全軍廣東陸路提督劉松山將該軍應需額餉暨應領雜項臚列款目呈請核辦前來臣查

奏稿卷二十九

三

劉松山原部步隊十七營馬隊兩營每月應需額餉六萬四千五百兩而新添之壽字馬隊三營步隊一營不在此數今江蘇協撥該軍餉銀月六萬兩以該提督原部計之每月卽缺額餉四千有奇合新添馬步四營所缺額餉計之則每月缺餉一萬五六十兩至帳棚車輛爲軍營所必不可少該軍帳棚一項向章由金陵糧臺給價自行製辦計每營每年更換一次應領制錢八百二十餘千文該軍老湘十營棚價自同治七年正月起和厚兩營棚價自同治六年正月起副前旂棚價自同治六年六月起副中左右後四旂棚價自同治六年五月起壽字前營馬隊棚價自同治六年十一月起續設壽字左營馬隊棚價自同治七年閏四月十五日

起概未給發計截至同治七年底止各營應領棚價制錢約兩萬餘千文以銀合錢約應領銀一萬數千兩其車輛一項該軍向章步隊每營給大車九輛馬隊每營給大車五輛每輛例價銀八十兩由各營官領價購備除該提督原部各營均已照章給領外其續設之副中左右後步隊四營應用大車三十六輛壽字左營馬隊應用大車五輛共應領銀三千二百餘兩該軍前次西征因秦中米價昂貴經曾國藩奏准自同治六年正月起無論員弁勇夫每名每月加發米價銀四錢五分在案所有續設之壽字左營馬隊從同治七年閏四月十五日起至年底止約應領加發米價銀一千餘兩又該軍原設壽字前營馬勇額馬二百五十五匹營哨幫

奏稿卷二十九

閩

辦額馬二十六匹每百匹每年准報倒馬三十六匹每馬一匹給價銀十七兩五錢同治六年分馬勇倒馬例價已經發給營哨幫辦倒馬例價尚未請領計應補領銀一百五十餘兩七年分照額應報倒馬九十九匹應領銀一千七百餘兩而屢次打仗暨偵探公幹被害受傷各弁勇丁共應領卹養等項銀二萬七千零三十五兩尤屬要需該提督以上年逐日追勦事平後即整理西征不得不從權辦理挪移餉項購辦帳棚車輛發給卹養米價馬價稍爲敷衍亟盼金陵糧臺陸續籌撥以資彌補見該提督接奉會國藩移知該軍已奏定由江南月協餉銀六萬兩此外各款未便再由江南糧臺另算籌撥等因此後之協撥爲數既屬不敷以前之

積欠挪移又歸無著辦理實爲掣肘合無仰懇

天恩俯念西事方殷劉松山一軍尤爲得力

敕下新任兩江督臣馬新貽倣照舊案供支老湘軍月餉其帳棚

卹養等項仍由江南籌給俾該軍餉糈無虞缺乏於山西秦隴防

勦諸務實有裨益所有老湘全軍額餉短絀領項虛懸情形謹繕

摺馳奏伏乞

皇太后

皇上聖鑒訓示施行謹 奏

軍機大臣奉

旨另有旨欽此

奏稿卷二十九

墨

軍機大臣字寄同治七年十一月二十八日奉

上諭左宗棠等奏各路擊賊獲勝見籌布置情形鄭敦謹奏沿河擊退竄匪并請敕宋慶毋庸入晉各摺片覽奏均悉綏德延安等處土回各匪疊經成定康劉厚填各軍勦擊殲斃甚多賊勢漸已衰蹙左宗棠檄令劉松山一軍由陝州茅津渡河入晉徑赴汾州并以宋慶一軍北趨甯朔爲歸綏後勁所籌甚是著卽飭令劉松山於到汾後擇地駐紮先固晉防并探聽軍情自酌進止該軍餉項本日已諭知馬新貽等照舊措解矣張曜不久卽抵榆林自可與金順會商戰事惟黃河冰橋早結秦之東北仍應力籌兼顧扼賊東趨著左宗棠庫克吉泰劉典迅飭劉端冕等分途追擊痛殄

奏稿卷二十九

吳

逆氛使不得乘機北竄其踞董志原之陝回食竭求撫能否就地安插并著該大臣等隨時酌辦沿河賊匪分竄永甯大甯等處雖經晉軍擊回難保不乘隙偷渡仍著鄭敦謹督率在防將士及沿河各地方文武於河冰未泮之前晝夜梭巡見賊卽擊不准稍有疏虞宋慶見已由豫起程該軍行抵晉境時該署撫當懷遵前旨卽令該提督統率所部徑赴歸綏以資厚集郭寶昌軍需餉方殷未便任其久待鄭敦謹仍飭該藩司按月籌發不必以蘇餉抵解致有缺乏其江蘇月協山西餉銀一萬兩已諭知馬新貽等按月撥解綏歸地方緊要定安等當就見有兵力妥爲堵禦一面咨令馬陞加意嚴防俟神機營所撥各隊到綏卽會同杜嘎爾相機進

擊用靖邊陲將此由六百里各諭令知之欽此

奏稿卷二十九

七

陝甘米捐兩局收捐正印各項官階懇准展限一年片

同治七年十一月二

十一日會署陝西巡撫劉典銜

再陝西捐餉局章程前陝西撫臣奏准變通推廣米捐州縣兩項

陝局暨各省陝捐分局均准收捐以一年爲限滿卽停止嗣臣宗

棠以甘省糧餉奇絀奏准援案辦理米捐於陝西湖廣等省分途

設立甘省米捐局道府州縣等項官階及捐免迴避坐補歷俸在

任候選捐免引

見降革人員捐復軍營保舉文員分發後報捐指省等項均准赴

甘捐各局上兌仍以一年爲限滿卽停止均先後飭局遵辦在案

頃據陝甘捐餉局兼辦甘省米捐局司道詳稱陝捐於六年十一

奏稿卷二十九

吳

月初一日開局甘捐於六年十二月初二日開局見在一年限屆

而捐項毫無贏餘兼之大兵雲集需餉浩繁秦隴地方連年兵燹

錢糧釐稅均不足恃全賴捐輸挹注若道府州縣等項一概停止

是用款愈增餉源愈涸應請將道府州縣等捐展限一年仍俟限

滿卽行停止等情前來臣宗棠臣典會核無異合無仰懇

天恩俯念陝甘軍務正殷籌餉萬難准將道府州縣等項及捐免

迴避各項甘局再行收捐一年州縣兩項陝局再行收捐一年以

裨餉糈而維大局謹附片會陳伏乞

聖鑒施行謹 奏

軍機大臣奉

旨戶部議奏欽此

奏稿卷二十九

兪

甘捐請獎請照陝章由設局省分督撫咨送部監片

同治七年十一月廿一日

再臣前因甘餉奇絀奏請於川陝湘鄂晉豫等省設局勸辦米捐

除湘省米捐經湖南撫

臣

奏准歸併南捐勸辦不計外其五省甘

捐分局請獎均遵照章程造具捐生清冊由臣咨送部監核辦嗣

臣以皖捐請獎清冊卽由捐局徑送部監較爲省便復飭陝省甘

捐局改照皖章辦理頃據陝西捐餉局兼辦甘省米捐局司道詳

稱見在陝捐分局請獎案件議定由各分局詳請設局省分督撫

咨送部監若甘捐請獎清冊由局徑送辦理殊覺兩歧應請飭各

省甘捐分局嗣後請獎均照陝章造具捐生清冊詳送設局省分

督撫就近咨送部監以歸畫一等情前來臣覆核無異相應請

奏稿卷二十九

辛

旨敕部立案俟

命下之日卽通飭甘捐各局一體遵辦謹附片具陳伏乞

聖鑒施行謹 奏

軍機大臣奉

旨著照所請該部知道欽此

勦賊連獲勝仗摺

同治七年十二月初十日會西安將軍庫克吉泰署陝西巡撫劉典銜

奏爲官軍勦賊連獲勝仗據實馳陳仰祈

聖鑒事竊十月杪及十一月初旬各軍勦賊獲勝情形業經

臣等

於十一月二十一日馳報并將分軍由山西兜勦先固河防調撥機宜據實陳明續據道銜知府署綏德州知州成定康稟報官軍自連破應牛寨霍家溝生擒匪目張萬雲斬之匪目張登第乞降畱閩補用同知陳瑞芝受之十一月初八日成定康率所部進至張家堰遙見匪眾千餘攻劉家寨甚急卽飭參將戴光明由右都司殷忠廷由左而自率親軍及總兵喻先恕由中路急進將進劉家寨賊騎數百由寨後小溝橫截而出突圍成定康及喻先恕先

奏稿卷二十九

三

鋒親兵各隊成定康喻先恕皆下馬步戰親擎洋槍連環轟擊斃賊數名鏖戰數刻各哨勇丁飛奔而至槍礮齊轟賊騎敗遁步賊奪路狂奔適戴光明由右路至截其去路羣賊回旂返撲成定康喻先恕麾所部截之寨民百餘亦持械追逐賊馳而左復與殷忠廷遇各路會集環攻頃刻賊屍填滿坑坎僅一賊目同十餘騎衝出此股悉數就殲計共斃賊千餘獲馬騾五百餘匹訊據生賊供衝逸之賊卽頭目辛滿城曾約同賊目張萬飛由義合鎮內竄張萬飛聞辛滿城經官軍擊敗不敢內竄改由義合鎮南竄出攻陷雷家寨雷家寨距州城七十里十一日辰刻成定康率師追之行抵薛家茆訶知賊已由雷家溝竄渡無定河盤踞峪口海座灣一

帶正攻王家寨成定康飭陳瑞芝先赴河邊架浮橋是夜五更潛師夜起十二日辰刻渡河進擊方半渡時賊騎數百蜂擁而至殷忠廷整隊迎擊酣戰數刻戴光明率隊踵至賊皆下馬挺矛格鬪成定康率所部由左路抄出賊後號鼓齊鳴賊駭而奔官軍乘勢掩殺追過王家山賊復回拒鄧萬盛徐尙清督隊猛擊戴光明帶洋槍隊陷陣轟斃悍賊數十賊敗向張家臺狂走喻先恕殷忠廷率隊追至殿子溝邱家寨一帶收隊計是役共斃賊數百名生擒百餘名奪獲騾馬三百餘匹餘賊向清澗竄逸此成定康十一月初八十二等日痛剿高逆餘黨張萬飛辛滿城獲勝實在情形也見據成定康稟二十六日進剿清澗踞賊賊目李登李雙良辛滿

奏稿卷二十九

三

城等畏勦乞撫

臣

等筋熟察賊情及安插地方稟候核酌尙未接

據續報其榆林一帶戰事已由金順馳報矣董志原回逆疊經勦

敗兇鋒大挫然因飢掠食蹤迹靡常十一月十五日探報馬入禮

率回土各匪二千餘竄至隴州城西四十里之咸宜關運司銜陝

西試用道喻步運卽於是夜三鼓率副將劉寶元總兵蕭羣魁副

將龔曉亭由曹家灣進剿天明抵咸宜鎮訶賊在黃家溝卽捲旂

襲之殺賊三四百名生擒回逆魯三元洪包連及土匪周七等十

餘名奪獲騾馬百數十匹十九夜提督周紹濂所部張大雄會勦

竄擾中部縣屬之五家原逆回斃悍回百餘騎該逆分股一竄西

家溝一竄宜君屬之偏橋而大股則仍踞店頭二十日張大雄商

同副將劉甫田李賓光各自防所率隊截之周紹濂得報卽夜飛飭總兵董玉春扼隆坊一面料理中部城防親率所部及參將毛正明於是夜初更向蘇家嶮進行十餘里見村前火光知賊屯踞未動潛往撲之賊覺驚號遽滅其火是時夜黑不辨賊數多寡惟視火光明處轟擊賊眾亂竄人馬自相蹂藉分向店頭而遁適董玉春率所部由四溝裏橫截而出斬馘尤多正收隊間遙聞偏橋一帶槍礮聲知張大雄周玉林劉甫田等正在接仗周紹濂率隊向西布莊前進半路接探報知賊以四五百騎抗拒張大雄等各營步賊急護所掠之牲糧向趙家寨王家莊而遁已經張大雄周玉林劉甫田前後夾擊斃賊甚多步賊盡棄所掠牲糧潰走周紹

奏稿卷二十九

臺

濂飭毛正明迅扼黎原而自率中營馳赴張寨時則皓月東升霜華皎潔遙見逆騎紛馳而來周紹濂麾各軍前截後追頃刻賊屍枕藉其墜坑塹死者亦無數計共斃賊千餘名生擒十餘名訊知逆目舒阿渾已於陣前轟斃矣兩路分竄之賊殲除殆盡僅餘百餘騎投歸店頭大夥其首先竄過之賊約二三百騎則已竄至洛川澄城邵陽白水等處倏隱倏見尙未捕斬淨盡此周紹濂一軍截剿中部宜君竄掠之回逆兩獲勝仗情形也十九日回逆數千突入甘肅慶陽府屬正甯縣城知縣黃紹薪率防勇巷戰正苦不支賊以空城荒寂一無所掠旋亦退去新授陝安道黃鼎福建候補知府劉倬雲聞警各率所部馳援二十一日黎明劉倬雲行抵

正甯四村原上甫成列而賊騎數百突至副將劉忠發祝鑑嵩督隊奮擊立斃賊數十名賊卽向南主原紛竄劉倬雲令兩營列隊千家村自率各營列陣前進行抵正甯縣南見城上旂幟森然知黃鼎之軍已至矣劉倬雲以正甯兵力已厚而三水縣職田鎮空虛立飭四營收回三水自率親兵與總兵徐萬福助黃鼎勦北原之賊正拔隊間忽三水老營報到午刻突來大股回逆竄至職田附近之羊坡頭阿搭坪等處肆掠距職田不過數里劉倬雲急率隊回援三鼓後回營料賊敗必由大灣南莊槐樹坡關家川苜蓿嶺而遁令劉忠發祝鑑嵩及都司王蓋臣伏於關家川扼之自率四營向羊坡頭進剿天明抵羊坡頭列方陣分左右進遇賊探騎

奏稿卷二十九

焉

擊敗之各村之賊齊出抗拒總兵周玉堂徐萬福都司李躍騎等奮威衝殺斃賊數百名賊向大灣疾遁劉倬雲知前路偪仄催軍猛擊賊擠墮澗壑者無數官軍追出谷口截賊爲二其大股向關家川鼠竄適劉忠發祝鑑嵩王蓋臣等馳至賊正回頭抵拒追軍不虞劉忠發等從關家川溝中突起震懼失措官軍兩面夾擊斃賊又數百名日暮收隊計共斃賊千餘名生擒二十餘名軍前正法奪驟馬二百餘匹黃鼎於二十一日由邠州炭店馳援正甯沿途遇賊卽擊約斃賊百數十名收隊入城二十二日追賊文家川知羊坡頭之賊已經劉倬雲擊敗收隊回邠州而連日接據各路探報逆騎數大股分擾邠州三水北境永樂堡底廟鎮滄場麻園

東西牛家堡一帶黃鼎擬俟賊蹤稍定擊之二十七夜三鼓出隊馳四十餘里天明上永樂原見騎賊方攻陷師家河堡寨搬運糧食黃鼎飭參將林定遠截之而親率三營徑擣底廟之賊甫至底廟原適師家河賊已經林定遠擊敗由店子河向底廟竄來副將李玉春急率親軍扼之而林定遠又自後猛躡而至賊窘蹙莫支皆棄馬跳巖求免官軍併力轟刺無得脫者總兵聿占雄徑攻底廟原賊方憑堡穩抗而麻園之賊又至知縣雷炯督隊截之正鏖戰間聿占雄已督隊躍上堡牆堡中羣賊冒死由後門竄走併入大股維時總兵徐占彪副將陳春萬趙興隆皮昌魁率所部各營已破東牛家堡永樂堡之賊羣賊均奔集底廟騎賊約四千餘人

奏稿卷二十九

羣

步賊約七八百人見官軍僅兩營在底廟遂四路齊撲兩營黃鼎布方陣屹立不動調林定遠及遊擊何玉超從右路滄場抄出賊後親督兩營擡方陣而進遇賊撲近則槍礮四面轟之賊騎旋即旋前槍礮亦再接再厲斃賊甚多賊向後路狂奔適遇林定遠何玉超馳至賊懼不得脫復分股抗拒官軍夾擊之其向寺村旁竄者黃鼎麾所部截斷二百餘騎殲賊而奪其馬追至寺村賊紛紛下宮河原竄遁冰凝路滑跌斃又多乃收隊回底廟而徐占彪等由底廟牛家堡收隊回營亦殺賊百餘名計黃鼎一軍是役共殺賊千數百名奪戰馬二百餘匹生擒十餘名而官軍陣亡馬隊隊長儘先副將明占魁勇丁之帶重傷者五十二名維時劉倬雲率

隊由職田馳至適遇敗賊從四村竄向郭家村卽整隊截擊復斃賊數十名訊據生賊供稱此次竄擾邠州三水北路之賊係回目白彥虎馬長順鄒阿渾等各股其禹得彥崔偉卽崔三陳林馬正和等逆酋則方赴隴州求撫其黨赴水羅城一帶擄糧未與俱來等語此劉倬雲黃鼎兩軍十一月二十二二十三二十八等日擊敗董志原逆回大獲勝仗實在情形也其另股渡涇河而南者擾及長武靈臺兩縣北路二十七日陝西提督雷正綰督同總兵閻定邦先擊長武北路之賊行抵封頭堡卽與賊遇雷正綰閻定邦督隊衝殺立斃悍賊數十名賊卽敗潰沿途追殺共計斃賊二百餘名生擒逆回馬順兒虎秀哩正法奪獲騾馬二百餘匹賊奔回

奏稿卷二十九

奏

董志原老巢適涇州知州林發深飛報回逆撲涇州甚急雷正綰卽率所部援剿二十八日馳抵涇州三十里鋪賊已聞風遠遁涇州解嚴此股似卽馬正和等分出掠食黨夥生賊所供水羅城擄糧之賊也竊維董志原回逆號稱十八營回目馮君福楊文治馬生彥三逆已遁入金積堡所有夥黨均歸併白彥虎馬長順等其禹得彥崔偉馬正和陳林等在諸回酋中頗稱桀黠見因屢次出巢掠食均經官軍痛剿飢蹙日甚浼同甘肅清水縣已撫回目李得昌由隴州遞稟前來臣等公同閱看情詞似非虛妄然撫之爲難較甚於剿雖未便概予峻拒絕其就撫之機亦未可遽許招安墮其緩剿之計除仍開誠曉示外仍飭各軍迅速轉運芻粟約期

移營進備慎以圖之所有見在各軍戰勝情形謹合詞據實馳奏  
伏乞

皇太后

皇上聖鑒訓示施行謹 奏

軍機大臣奉

旨另有旨欽此

奏稿卷二十九

五

彭玉麟撥助陝餉片

同治七年十月初十日

再臣頃接前兵部侍郎彭玉麟函知聞臣軍艱苦情形於長江水師月餉節縮贏餘項下撥給銀二萬兩交臣湖北省城陝甘後路糧臺搭解陝西以資接濟函中并稱身受

朝廷厚恩以寒士來以寒士去等因臣既欽其清操絕世又因臣遇蹇薄無裨時艱不禁媿感交集雖所撥無多而清直之行較然不欺實足風勵末俗可否仰懇

天恩宣示嘉獎之處出自

聖慈臣不敢壅於上聞伏乞

聖鑒訓示謹 奏

奏稿卷二十九

奏

軍機大臣奉

旨另有旨欽此

知府成定康請以道員記名

簡放片

同治七年十月初十日

再道銜知府署綏德州知州成定康廉直勇往血性過人

臣所素

知其過於伉爽恐遭時忌故每加裁抑未遽登之薦牘冀其養成大器以備

朝廷任使耳茲覽其函牘徵之行事證以秦晉諸將領所言實爲一時不可多得之選該員耿介絕俗才品均卓不僅以戰功見而卽戰功言之如

臣

累疏所陳其功績亦實有未可掩抑者合無仰

懇

天恩以道員記名遇有陝甘道員缺出請

旨簡放俾

臣

得收指臂之助出自

奏稿卷二十九

奏

聖裁謹附片陳明伏乞

聖鑒訓示施行謹

奏

軍機大臣奉

旨另有旨欽此

請將冒餉之丁太洋正法片

同治七年十月初十日

再臣所部花翎遊擊丁太洋自福建汀州投誠後由軍功從征閩粵積功保升都司前年臣過九江丁太洋堅請入營投效上年隨

臣入陝見其臨陣奮勇始令其募帶一營隨臣赴直隸山東勦賊

洵保今職該員初猶謹飭西旋以後漸形驕逸不守營規彰德會隊以後沿途察其隊伍不整似有缺額因道途曉夜趨行不便點驗比抵西安結營西關外密飭總理營務處道員祝壇李耀南按棚點驗竟缺額至一百四十餘名之多比調集該營親閱點名小操無可掩飾比將該營官撤退發交西安府看管聽候參辦該營勇額亦經補足派員管帶伏念花翎遊擊丁太洋由投誠積功保

奏稿卷二十九

李

至遊擊充當營官不知感奮圖報竟敢短缺勇額至一百四十餘名希圖冒銷錢糧雖月餉僅發至本年五月止冒銷之餉尚未入己然貪詐情形業經敗露若不從嚴懲辦何以肅軍律而警效尤應請

旨正法軍前以昭炯戒伏乞

聖鑒訓示施行謹 奏

軍機大臣奉

旨另有旨欽此

軍機大臣字寄同治七年十二月十六日奉

上諭左宗棠等奏官軍勦賊疊勝情形一摺高逆餘黨張萬飛等糾合內竄經成定康痛勦獲勝餘賊向清澗竄逸周紹濂一軍復將中部宜君竄賊擊退董志原逆回突入甘肅正甯縣城并分擾邠州三水北境均經劉倬雲黃鼎兩軍擊敗其竄撲涇州之賊亦經雷正綰馳援解圍勦辦均爲得手惟洛川澄城郃陽白水等處尙有賊騎出沒著仍飭周紹濂實力搜捕悉數殲除并飭成定康將竄向清澗之賊迅速追勦董志原賊匪雖已被擊回巢而來去無定仍當督飭各軍分途堵勦遇賊卽擊勿令深入陝境其榆林一帶及邊外竄匪雖經金順督軍追勦而後路必須有兵策應杜

奏稿卷二十九

三

其續竄之路使邊外之賊勢成孤立較易殲除且延榆綏沿河一帶尤必隨處有兵截擊庶不至竄越鄰疆左宗棠庫克吉泰劉典務當妥籌兼顧以維全局回目禹得彥等遞稟求撫未必可恃該大臣等當嚴飭諸軍奮力進勦懾以兵威察其真心悔罪酌量收撫方爲一勞永逸之計陝甘賊匪頭緒紛繁應如何入手次第剪除之處著左宗棠等熟籌方略迅圖大舉毋稍遷延左宗棠另片奏彭玉麟於水師月餉贏餘項下撥解該督軍營銀二萬兩尙屬能顧大局又片奏知府成定康戰功卓著請予獎勵等語成定康著交軍機處存記候旨錄用又片奏遊擊丁大洋所部勇丁缺額甚多意圖冒餉著卽於軍前正法以肅軍律將此由六百里各諭

令知之欽此

奏稿卷二十九

奎

軍餉匱絕請 救籌撥實餉急救危疆摺

同治七年十月初十日

奏爲軍餉匱絕請

旨敕催以維大局事竊

臣

西征實餉前蒙

恩允部撥六成洋稅銀一百萬兩疊經催解僅准湖北谷覆飭江漢關撥解銀入萬兩交鄂設後路糧臺轉解閩浙督

臣

借撥四成洋稅銀十萬兩浙海關五萬兩交上海轉運局匯解其江海關之五十萬兩馬新貽函稱年內無款撥解此外則并無一字見覆統計西征實餉年內僅祇江漢關八萬兩到陝閩之十萬浙之五萬雖定於十二月二十五日在解州運城匯兌明正或可到陝餘均無望矣以戰事論回首畏勦求撫其情甚迫頃據道銜知府署綏

奏稿卷二十九

奎

德州知州成定康稟土匪李登李雙良遞呈求撫其情亦迫劉松山又已馳抵山西永甯州賊之畏勦本在意中復見大軍近徧就撫之心當益決

臣

與劉典擬併圖之然言勦則必須儲芻粟籌轉運備行糧言撫則必給口食籌安插開屯田兩者均非實餉到手通融挹注隨機立應不可前蒙

恩准撥河東鹽課二十萬兩四川鹽釐二十萬兩

臣

懍遵

諭旨以四川之二十萬兩撥歸甘肅以河東之二十萬兩撥歸陝

西彼此就近提取稍期迅捷然

臣

與劉典各軍已欠餉七八箇月

未發雖河東鹽餉二十萬兩年內可以到齊而山西照常應解郭

寶昌一軍及

臣

軍月餉自八月至十一月四箇月共計十四萬兩

未解河東本欠慶陽雷正綰軍餉五萬兩未解是奏提河東鹽餉二十萬除抵山西應解之陝餉河東應解之慶陽協餉共十九萬兩僅得銀一萬兩挪東掩西得此失彼於陝餉終無實濟其奏提四川鹽釐二十萬兩甫准吳棠允撥三萬兩而陝甘委員在蜀勸捐已發各縣之貢監從九部監執照五千餘張則已經吳棠奏請歸併成都重慶兩局餘均飭令撤繳是甘肅得四川見銀三萬兩失去捐餉二十餘萬兩也臣與劉典各軍月餉僅發至本年五月及前四月止已積欠七八箇月而年內入餉僅止二十八萬計尚不敷一月支放其敷衍之資更將何所指望乎陝甘窘迫之狀如此待用之繁且鉅如此而

奏稿卷二十九

齋

諭旨准撥之餉如此續奏山西四川之餉又如此臣計無復之一死曷足塞責不得不瀝陳哀籲於

君父之前萬一陝甘危局得以瓦全臣可稍延殘喘

國家之福陝甘之幸亦臣之幸也倘陝甘將來或因無餉而致決裂臣無所逃罪而內外諸臣謀

國之疏宥有不能無遺議者伏念臣初次請撥西征實餉部臣以

六成洋稅應夫豈不知各海關六成洋稅之早已提空也嗣請撥

常年實餉四百萬兩部臣緩俟各省奏到之日始議劃撥夫豈不

知各省釐稅千數百萬兩本爲

國家固有之款各省可撥之款也臣原奏據陝西撫臣署陝甘督

臣陳明短缺實餉四百餘萬兩其各省見協之款本不在內而部  
又誤將見協之餉歸併臣續請之四百萬兩計算夫豈不知陝

甘常年應撥之餉本不止四百萬兩也部臣爲肅清之各省籌應

雷之款獨不當爲陝甘籌應撥之款乎各省均專籌本省撤兵雷

兵之餉獨不當爲陝甘籌用兵之餉乎至於安徽撫臣英翰署撫

臣吳坤修奏增郭寶昌馬步隊三千五百名合之該軍入陝者七

千有奇不過藉西征之名以雷皖餉安插皖勇名爲協陝實則無

益於陝西之兵事而有損於陝西之餉事又無論也應否請

旨敕下部臣籌撥陝甘實餉

敕催各省督撫海關諸臣速撥陝甘實餉彼此至誠許與急救危

奏稿卷二十九

壹

疆之處出自

宸衷獨斷臣之愚誠已盡於此伏乞

皇太后

皇上聖鑒訓示謹 奏

軍機大臣奉

旨戶部速議具奏欽此

